

gen/soll er sein heuwer hefftig loben/vnd jnen auch zun zeiten geschenck aufstel-
 len/damitt sie vñ ander zu der arbeit destter lustiger wurden / herwiderumb die
 farlessigen soll er schellten/vñ etliche vom bergtwerck stossen/vñ embfuge an jr
 statt setzen. Es soll auch über das ein herz zum offtermals tag vnd nacht bey dē
 arbeitern bleibē/welche bleibung soll nicht trāg noch weich sein/ dan es ist einē
 fleissigen bergtman/ & sein eigen gūt mehrē will/hoch von nōtē/dz er oft in die
 grübē fahre/vñ etwas zeits anwēde/die art vñ eigenschafft & gāngē vñ klüffte
 zū erfaren/vnd so woll inwendig als außwendig alle weiß vñ massen/zū arbeits-
 ten ansāhe vnd bedencke. Nicht allein aber soll er diß thū/sond auch zun zeiten
 etliche arbeit an die handt nāmen/nicht das er in disen dingen erlige/sond das
 er mitt seinē fleiß die arbeit erwecke / vnd sie auch sein künst lehre / dan es wirt
 wol vmb dz bergtwerck stehn/ so nicht allein & steiger/sond auch & gwerckherz/
 lehret was in dem zū thū seye. Derhalben hatt ein außlender/ wie Xenophon
 schreibt/dem künig recht geantwortet/das aug des herzen möstet das pferdt/
 dan der fleiß des herzen gilt vil in allen dingen. Vnd dieweil vil in der gemein/
 kōsten an dz artz anwenden/wirt es jnen geschickt vñ nutzlich sein/dz sie auß jnen
 bergtampleit vñ steiger kiesend od wellend. Dan dieweil die leüt habē gemein-
 lich auff jr sachen sorgen/vñ lassen frembde sachen fahren / mögendt die selbigē
 das jr nicht versorgen/ sie haben dan auch & frembdē sorgen/ auch nicht fremde
 ding ohn sorg lassen hinghen / da sie nicht das jr zūgleich mitt versaumendt/so
 es sach wāre/ das niemandt vnd jnē solche āmpter wōlt an sich nemen/ od wāre
 nicht dauchtig darzū/wirt es gemeinē gwercken nutz sein/das sie solche ding den
 aller fleissigsten mennerñ befālen vñ außlegen. Vorzeiten ist fürwar solche sach
 dem bergamptman hefftig anglegen / es wārint nun die gwercken künig/ als
 Priamus der goldtbergtwerck oder goldtgrübenn vmb den Abyden. Wydas
 diser bergwercken die do im gebirgk Berimo glegen seindt / Gyges/ Alyattes/
 Crōsus/ deren die bei der öde statt zwischen Atarneam vnd Pergamū gewāsen
 seindt/ oder wārint burgerliche regiment/ wie die Carthagineses über die syl-
 ber grübenn die in Hispania berūmpt wārendt/ oder wārint grosse vnd herrlis-
 che gschlächter / wie zū Athen der grübē des gebirgs Laurei. Diß wirt auch fer-
 ner dem gwercken so des bergtwercks noch vnerfāre / zū seinen rechnungen sehr
 nutz sein / dz er gemeine kōstē auch mitt seinē anderē gwerckē treibe/vnd das nicht
 allein in einer grübenn/sonder in vilen. Dan welcher allein in einer zechen kōsten
 treibt/so jm das glück ein reichen gang von artz/ vnd anderen dingen die man
 auß der erden grebt/ gibet/wirt er über die massen reich / so ihm aber das glück
 nicht wol will/so gibt sie ihm ein schlächten gang / der arm vnd schnātig ist/da
 er müß allen kōsten/den er sein lebttag darauff wendet/verlieren. Der aber sein
 gelt gemeinlich mit anderen gwercken auff einē reichen bergtwerck verbawt/ &
 selbig verleurt gar selten sein mühe vnd kōsten / sonder das glück wirt gar oft
 nach seinē wūsch gerhatē. Dan so auß zwölff zechē die man in & gemein bauwet/
 nuhr eine anghet/so wirt nicht allein dem herzen sein gelt das er hatt auß geben
 nicht verloren / sonder hatt auch dessen über dasselbig ein grossen gwin/vnd es
 wirt ihm fürwar das Bergtwerck ein grossen nutz tragen / dem zwo oder drey
 oder vier zechen anghend. Diser rhat aber ist nicht vast vngleich dem rhat Xe-
 nophonis/welchen die von Athen gefragt haben / was jnen zū thū seye/so sie
 wōllen neuwe sylber gāng on jren schaden bauwen/ hatt er zū antwort geben.
 es seiendt zū Athen zehenn zünfft/derhalben so die stat einer ieden zünfft gleich
 so vil knecht zūgeben wurde/vnd sie neuwe gāng mitt gleichem glück antreffen
 mitt diser weise/so ein zünfft ein reichen gang vom sylber antroffenn hatt / so
 wirt die selbige ohn zweifel den anderen allen nutz bringenn/so aber zwo oder
 drey/oder vier/oder der halb teill der zünfften solch artz antreffenn werden/
 so wirt die arbeit dest reichlicher erschiesenn. Dann das die hoffnung alle
 zünfft sol betriegen/ist der gleichen nie geschāhen. Vnd wiewol diser rhat Xe-
 nophonis

nophonis